



VERSCHNUUFFER

Fasnacht 2008

Abglöscht

Mir fraie-n-ys, denn s Fyyr isch glescht!
Die Nooricht gilt als Grund zem Fescht.
Doch laider sin mir numme froo,
wenn d Brandkontrolle d Sach isch, wo
zem Juuble Aaloss git. Und nid
dass s hailig inner Fyyr nimm git.

Dass by-n-ys z Basel s Feu sacré
am Särble-n-isch kasch gse, well Cré-
atione wie s Casino grad
der Bach ab gehn. S isch schampar schaad
nimmt z Basel glyych, wie in däm Land
d Nai-Saager-Masse iiberhand.

S wird Alts zwar prächtig renoviert
und Neys im Asatz au probiert
doch mergsch als Creative gschwind
in Basel wait der „Bhalti-Wind“
und s luegt trotz Effort wenig uuse.
Das Kaff isch numme no am Pfuuse.

S wird Neys do kurzerhand beschränggt
und gschwind uf d Brämsspuur uuse drängt.
Bevoor me ebbis ussprobiert
wird s kunschtgerächt reglementiert.
Falls Gweents mir ebbe ändere sotte
wird s voorsichtshalber zerscht verbotte.

Kasch offeni Gschäfte lang go sueche,
De derfsch nimm Rauche oder Flueche,
s Vehikel niene mee parkiere
und jo nid dängge bim Regiere.
De derfsch im Freye nimme schmuuse
und wenn De z digg bisch sottsich nimm uuse.

S sin Lärm und Lache schwär verpönt
so Unrue isch me do nimm gwönt.
Sottsich Du uf offener Strooss gar niese
mueschs uf e Wooghooft grad go biesse.
Die radikali Taliban
fänd Basel-Stadt der blutti Wahn!

S isch d Taktik numme schwär z begryffe
wieso dass s Bsundere sottsich schlyffe
und ins Konforme ynezwinge.
Das ka aim kaini Fans yybringe.
Was aim vom andere unterschaidet
verhinderet, dass me verlaidet.

Drum miesst me z Basel gschwind probiere
Speziells in grossem Maass z kreiere.
Es sin sogar au Plän scho do
zem Bau vom Helix-Roche-Turm, wo
no usse ganz e toll Symbol isch:
D Roche zaigt, wie s ihre z Basel wohl isch.

E jeedi Stadt fänd das der Hit;
nur Basel macht im Plan nid mit:
Me gspyyri negativi Wälle
vom dunggle Schattewurf. Denn sälle
steer d Noochberschaft. Drum syg au d Bitt:
Me bau dä Turm doch lieber nid.

Wenn s ganz dumm lauft ka s Dir bassiere
- sottsich Du Di unaagnääm uffiere -
dass d Schmiir Di wägwyyst und derzue
Rayonverbot griegsch; denn isch Rue.
Sott me nid – zem Iberleege –
d Babs Schneider mit so aim beleege?

Me ka sich z Basel nid entfalte
und sott derzue no d Klabbe halte.
Wirdsch aifach in e Schema zwängt,
wo Dir zem Woosyy gwiss nid längt.
So wirdsch visionslos, läär, fruschtriert,
au stinggig und demotiviert.

Wottsich so ne Basel zem drin Lääbe?
Findsch Du nid au das syg dernääbe?
Wirf Eel ins inner Flämmli dry!
Das abglöscht Doosyy isch verbyy!
Jetzt stand doch uff, hau uf e Tisch
und zaig ys, was e Bebbi isch!

D'Latärne Usstellig findet wie immer vom
Mäntig Z'Obe bis am Mittwoch Vormittag uff
em Minschterplatz statt.

schaub+rüedi druck ag, bern